

Poslovni susreti

KAKO ORGANIZOVANJE NA INOTRŽIŠTE

Globalna trgovačka i tehnička mreža - šansa za naše firme da dođu na američko tržište * Nužno uspostavljanje nove vizije kompanija * Nedostatak subjektiviteta države jasno izražen i u vanjskotrgovinskoj razmjeni

U organizaciji Mreže poslovne saradnje, a u dogovoru sa Vanjskotrgovinskom komorom Bosne i Hercegovine, u Sarajevu su u okviru održavanja Sajma "Gradnja i obnova", upriličeni Susreti bh. privrednika. Zamišljeni kao razgovor nevladinih i vladinih organizacija sa predstavnicima kompanija, Susreti su imali dva nivoa: plenarni, na kome je razgovarano o značaju saradnje, posebno sa aspekta marketinga kao forme uspostavljanja tješnje saradnje među kompanijama, i direktnim razgovorima predstavnika firmi o međusobnoj saradnji.

Govoreći o značaju Mreže..., predsjednik Mirsad Hromić je istakao važnost poslovnih susreta kao novog oblika saradnje sa aspekta nužnosti promjena u kompanijama, naročito potrebe uspostavljanja nove vizije kompanija radi njihovog dinamičnog rasta i razvoja.

Milan Lovrić, predsjednik Vanjskotrgovinske komore, osvrnuo se na trgovinsku razmjenu BiH, kazavši kako se najveći dio te razmjene obavlja sa 12 zemalja regije. On je istako razmjenu informacija jer je to preduslov da bi bh. firme zajednički mogle konkurirati na inotrzništu. Nedostatak subjektiviteta države, po njegovim riječima, jasno je izražen i u vanjskotrgovinskoj razmjeni, a ono osnovno što našim izvoznicima nedostaje jeste logistika. Založio se za uspostavljanje kontrole u uvozu robe, budući da je ona koju uvozimo nekvalitetna. Osvrćući se na pokazatelje u spoljnotrgovinskoj razmjeni, Lovrić je kazao da je u četiri ovogodišnja mjeseca nastavljen negativan trend, mada je došlo do blagog poboljšanja na relacijama izvoz-uvoz. Ipak, to nije moglo znatnije umanjiti veliki spoljnotrgovinski deficit.

O programu Globalne trgovačke i tehnološke mreže, koju finansira ameri-

čka Organizacija za međunarodnu saradnju - USAID, govorio je profesor sa Ekonomskog fakulteta u Sarajevu Dževad Šehić. Cilj ovog projekta jeste povećanje bh. sa američkim firmama. U

dosadašnjem radu preko ovog projekta obavljeno je transakcija u vrijednosti 1,6 miliona američkih dolara, a da pri tome naše firme ništa nisu uložile. On je pozvao sve naše kompanije da se uključe u Globalnu trgovačku i tehnološku mrežu za što je potrebno da kompanije imaju samo pristup Internetu.

Koliki će biti stvarni efekti ovih susreta, pokazat će se u narednom periodu.

R. ČEHAJIĆ

Inspekt RGH d.d. Sarajevo

NAJVIŠE ZAVISI OD VLASTITOG ANGAŽMANA Kontrola kvaliteta robe za izvoz postavlja se sve imperativnije * Kako to izgleda u praksi domaćih kontrolora

Kvalitet postaje ključni momenat u svim razgovorima o unapređenju bh. izvoza. Da bi se stiglo do jačih uporišta za ambicioznije aranžmane na inotrzništu, odnosno smanjenje, inače, katastrofalnog vanjskotrgovinskog debalansa, neophodno je dostići i odgovarajuće standarde. U tom kontekstu, razumljivo, postavlja se i pitanje kontrole kvaliteta. Imamo organizacije koje su verifikovane za ove poslove, ali se njihovi kapaciteti, kadrovski i materijalni, još uvijek nedovoljno koriste.

- Dometi u ovom značajnom sektoru privređivanja, dobrim dijelom, zavise od uređenosti države i poštivanja regulative - ističe dipl. inž. Halid Jazvin, direktor preduzeća "Inspekt RGH" d.d. Sarajevo. - U postojećim okolnostima, uglavnom, najviše toga zavisi od vlastitog angažmana, referenci, stečenih certifikata prestižnih svjetskih kuća, njihove stalne provjere i potvrđivanja, te povjerenja poslovnih partnera. "Inspekt RGH" ima tradiciju poslovanja u oblasti kontrole kvaliteta, tako da pokrivamo značajne firme na cijelom prostoru BiH. Imamo, recimo, vlastitu firmu u Pločama koja izdaje potrebne papire za potrebe "Aluminija". Tvornica glinice Birač u Zvorniku, koja kompletnu proizvodnju izvozi, takođe, angažuje naše kapacitete kontrole, zatim brojna preduzeća iz oblasti drvne industrije - "Krivaja", "Standard"... Radimo za "Sodu" iz Lukavca, uskoro i za KHK Lukavac. Činjenica je da svu robu za svjetsko tržište moraju pratiti i odgovarajući "papiri" organizacija za kontrolu kvaliteta, a bh. izvoznici će biti sve više suočeni sa rigoroznim uvjetima. To je realnost od koje moramo polaziti ukoliko želimo postići stabilniju poziciju na svjetskom tržištu.



Halid Jazvin

Dž. R.